

故宮博物院藏

四庫

全書

撤出本

彙編

第 六 冊

故宮博物院編
故宮出版社

第六冊 目錄

南北史合注卷四十——卷四十七 一

卷四十 三

卷四十一 四三

卷四十二 一〇七

卷四十三 一五一

卷四十四 二〇三

卷四十五 二四一

卷四十六 三一三

卷四十七 三七七

欽定四庫全書

史部

南北史合注卷

四十至
四十四

第三分

欽定四庫全書

南北史合注卷四十

明 李清 撰

列傳第二十九

南史四十

殷孝祖族子琰

劉勔子俊 孫孺 覽 遵 俊弟子苞
俊弟繪 繪弟瑱

殷孝祖陳郡長平人曾祖羨晉光祿勳孝祖少誕節好酒色有氣幹宋孝武時以軍功仕至積射將軍前廢帝

宮中藏書

景和元年為兗州刺史明帝初即位四方反叛孝武外甥司徒參軍潁川荀僧韶建議銜命徵孝祖入朝帝遣之時徐州刺史薛安都遣薛索兒等屯據津徑僧韶間行得至說孝祖曰景和凶狂開闢未有朝野憂危假命漏刻主上曾不決辰夸凶剪暴國亂朝危宜立公主公卿百辟人無異議而羣迷相扇構造無端貪利幼弱競懷希幸舅少有立功之志長以氣節成名若能控濟義勇還奉朝廷非唯匡主靜亂乃可垂名竹帛

宋書曰孝祖具問朝廷消息僧韶隨方酬譬并陳兵甲精強主欲委以前驅

孝祖即日棄妻子率文武二千人隨僧韶還都時普天同叛朝廷唯保丹陽一郡孝祖忽至衆力不少並僉楚壯士人情大安進孝祖號冠軍將軍假節督前鋒諸軍事御仗先有諸葛筒袖鎧鐵帽二十五石弩射之不能入帝悉賜孝祖孝祖負其誠節陵轢諸將

宋書曰臺軍有父子兄弟在南者孝祖並欲推治人

情乖離莫肯為用

時賊據赭圻孝祖將進攻之與大將王玄謨別悲不自勝衆並駭怪泰始二年三月三日與賊合戰每戰常以鼓蓋自隨軍中人相謂曰殷統軍可謂死將矣今與賊交鋒而以羽儀自標顯若射者十手攢射欲不斃得乎是日中流矢死追贈建安縣侯謚曰忠孝祖族子琰字敬珉父道鸞宋衡陽王義季右軍長史琰少為文帝所知見遇與琅邪王景文相埒前廢帝永光元年出為南

梁郡太守明帝泰始元年晉安王子勛兵起即以琰為
豫州刺史土人前右軍杜叔寶等並勸琰同子勛琰素
無部曲無以自立受制於叔寶

宋書曰叔寶乃坦子既土豪鄉望內外諸軍事並專
之又曰太宗知琰逼迫猶欲羈縻之以琰兄瑗為司
徒右長史子邈為山陽王休祐驃騎將軍

二年正月帝遣輔國將軍劉劭西攻之築長圍創攻道
於東南角并作大蝦蟇車載土牛皮蒙之三百人推以

塞塹

宋書曰二年正月太宗遣輔國將軍劉劬率寧朔將軍呂安國西討山陽王休祐為諸軍總統三月又遣寧朔將軍劉懷珍等馬步三軍助劬討琰琰將劉順柳倫皇甫道烈龐道生等馬步八千東據宛塘劬率衆軍並進去順數里立營時琰所遣諸軍並受順節度而以皇甫道烈土豪柳倫臺之所遣順本卑微惟不使統督二軍劬始至塹壘未立順欲擊之道烈倫

不同順不能獨進乃止既而勦營壘漸立不可復攻
因相持四月乃出軍攻勦順幢主樊僧整與臺馬軍
主段僧愛交稍僧整刺僧愛殺之僧愛勇冠三軍軍
中並懼太宗又遣太尉司馬垣閔率軍來會初叔寶
本謂臺軍住歷陽不辦進順等惟齋一月糧既與勦
相持久軍食盡叔寶發車千五百乘載米餉順自以
五千精兵防送之勦軍副呂安國曰劉順精甲八千
我衆不能居半相持既久強弱勢殊苟復推遷則無

以自立所賴者彼糧將盡我食有餘若叔寶米至非
惟難可復圖我亦不能持久今惟從間道襲其米車
出其不意若能制之將不戰走矣勦然之乃以疲弱
守營簡選千百精手配安國及軍主黃回等間路出
順後於橫塘抄之安國始行齎二日熟食食盡叔寶
不至將士並欲還安國曰卿等旦已一食今晚米車
必至若其不至夜去不晚叔寶果至以米車為函廂
陣叔寶於外為遊軍幢主楊仲懷領五百人居前與

安國回等相遇仲懷部曲皆欲退就叔寶并力擊安國仲懷曰賊至不擊復欲何待即便前戰回所領並淮南楚子天下精兵合戰便破之於陣殺仲懷仲懷所領五百人死盡叔寶至仲懷及士卒伏尸蔽野回等欲乘勝擊之安國曰彼將自走退軍三十里止宿夜遣騎參候叔寶果棄米車奔走安國復夜往焚米車驅牛二千餘頭還順衆潰奔還壽陽仍走淮西就常珍奇勔方軌而進叔寶嬰城自守勔與諸軍分營

城外山陽王休祐與琰書曰今大軍長驅日造城下
勢孤援絕若開門歸順自可不失富貴將佐小大並
保榮爵何故苟困士民自求壑膾妻息并盡老兄垂
白東市受刑耶幸自思之言如皎日上又遣王道隆
齋手詔宥琰罪勛亦與琰書并以琰兄瑗子邈書與
之琰與叔寶等皆有降意而衆心不一復嬰城固守
六月勛築長圍始合常珍奇遣周當垣式寶等率數
百人送仗與琰叔寶驍勇絕衆因留守北門乃率所

領開門掩襲勦入其營勦逃免式寶得勦衣帽而去
勦於是豎長圍治攻道於東南角并填塹東南角有
高樓隊主趙法進計曰外若進攻必先攻樓樓頽落
既傷將士又使人情阻壞不如先自毀之勦從其言
又用草茅苞土擲者如雲城內以火箭射之草未及
燃復土續至一二日塹便欲滿法進復獻計以鐵珠
子灌之珠子流滑悉緣隙得入草於是火燃二日間
草盡塹中土不過二三寸勦乃作大蝦蟇車載土牛

皮蒙之三百人推以塞塹琰戶曹參軍虞挹之造礮車擊之以石車悉破壞八月皇甫道烈柳倫等二十一人開門出降勔因此又與琰書有云若命足下髮膚不全兒侄彫耗者皇天后土實聞此言勔猶不決及尋陽已平叔寶閉絕子勔敗問傳者殺之時琰子邈擊建康太宗送邈與琰說南賊已平叔寶等猶疑守備方固時南賊降者並送琰城下與城內交言由是人情阻喪

十二月琰乃降時琰有疾以板自輿諸將帥面縛請罪
勅並撫宥之無所誅戮

宋書曰晉熙太守袁湛之據郡同逆沈靈寵自廬江
攻之湛之未知尋陽已敗固守不降靈寵乃取諸將
破劉胡文書置車中攻城未敗棄軍而走湛之得書
大駭其夜逃

後除少府加給事中卒官琰性和雅靜素寡嗜慾諳前
世舊事事兄甚謹少以名行見稱在壽陽被攻圍積時